

摘藻堂四庫全書薈要

經部

欽定四庫全書薈要

經部

御纂春秋直解卷五
上
下

詳校官原任侍講臣王燕緒



欽定四庫全書薈要卷一千八百三十五

經部

御纂春秋直解卷五上

壬戌惠王十有八年

在位二十有五年子襄王立

僖公

名申閔公之兄亦莊公庶子也

元年

春王正月

僖於閔雖兄然既嗣其位而後之矣况閔立而僖嘗

臣之公羊曰臣子一例是也故繼閔之弑不書即位也

齊師宋師曹師次于聶北救邢

前狄伐邢而齊救之今狄未伐而齊先救之何也前
伐邢擾之而已齊用偏師而狄已退今狄既入衛齊
桓策其必乘入衛之威而以全力偪邢故連三國之
師預至聶北以為之援乃不趨所急而有次者將以
俟邢之重困而市其德也韓非子曰鮑叔曰邢不亡

狄不敝狄不敝齊不重且救危之功小不如存亡之德大故次於聶北待邢亡也相持至於六月邢畏狄而潰於是有夷儀之遷

夏六月邢遷于夷儀

左云師逐狄人具邢器用而遷之是齊遷之也以邢遷為文者邢欲遷也正月次于聶北六月遷于夷儀邢之忍死待救可知也而三國之師不成為救固不待言矣

齊師宋師曹師城邢

邢遷夷儀夷儀固邢都矣故直曰城邢邢無力自城而齊城之使足以守故再序三師以著其實蓋與之也其於師之次邢之遷不相掩也桓公於魯似治亂之義於邢似持危之德於衛似興滅之仁魯亂由慶父桓以始亂而即除之則其義不彰迨國嗣再絕而高子來盟以靖其難故魯人至今猶望高子也邢危衛滅由於狄桓以將危而急拯之則其德不大方滅

而遽存之則其仁不深迨邢播遷而城邢以定其國
衛野處而城楚丘以續其封故邢遷如歸衛國忘亡
世傳為美談也蓋有事以為利乘敗以為功其心私
其功烈卑故與之而不盡與也

秋七月戊辰夫人姜氏薨于夷齊人以歸

夷齊地夫人孫于邾曷為薨于夷蓋桓公召而殺之
也變文書人討賊之辭也凡書以歸歸其國也討之
是也以歸非也即死所而葬之可矣

楚人伐鄭

鄭從齊而侵許故也楚之僭王罪應討又改楚為荆
不可云周之建國矣春秋故用外蠻之例以絕之及
來聘則接於魯難言荆來聘故書人今仍從周封之
名則可以王法正之故從王爵以正名而因事以為
詳略至治其僭王之罪而革其號不論書荆書楚一
也傳者於來聘書人曰嘉其慕義而進之伐鄭也而
亦書人豈嘉其猾夏而進之耶

八月公會齊侯宋公鄭伯曹伯邾人于榿

謀救鄭也謀而不救何也前嘗救鄭矣不足懲楚會而謀之將大舉焉召陵之師權輿於此矣有救而非救次于聶北是也有不救而深於救會于榿是也

九月公敗邾師于偃

哀姜奔邾而邾受之公請於會而討之可矣既會于榿而敗其師於義何居繼榿之會而書之蓋邀其歸而敗之曲在魯也

冬十月壬午公子友帥師敗莒師于酈獲莒挈

友以賂求慶父於莒莒以兵責賂友敗之而獲其將
莒貪而友詐也公賜友汶陽之田及費季氏於是始
大仲叔之後皆立於友三桓之禍友啟之也

十有二月丁巳夫人氏之喪至自齊

哀姜之薨至是一百七十日矣而始至蓋齊以其尸
歸絕之於魯而魯請之其喪自齊而至魯也前書孫
以明其當絕繼書以歸以明其當討則其至非也文

姜生還莊以為孝哀姜死至僖以為禮大義之不明
不至於禘廟致主不已其以病僖公也

二年

春王正月城楚丘

齊桓城三國屬辭各異皆以實書城邢者三國之師
也城緣陵承鹹之會諸侯即會鹹之諸侯也略而不
序者諸侯城之而齊不與也城楚丘雖與榘之會相
次然會以謀鄭非謀衛也况鄭逼楚自顧不暇何能

為衛執役宋曹既同城邢而齊宋又將會江黃惟魯
因內難凡役不與故齊命魯獨任楚丘之役觀與城
內邑同文可見矣何以不言城衛蓋邢遷夷儀邢未
亡也城夷儀即邢矣於城可以言邢狄入衛衛已滅
也城楚丘始有衛矣於城尚未可言衛也城邢辭繁
不殺此則略之何也衛之亡已涉三載今始城之邢
未亡而先城衛已亡而後城具見桓有厚薄之私焉
春秋以大公垂法故略以示譏乃公穀以為不與齊

之專封夫以地畀人而爵之之謂封衛雖為狄入其
爵自若楚丘其故地耳豈齊畀之而爵之哉至齊以
伯自居止以楚丘之城為專其說難通矣

夏五月辛巳葬我小君哀姜

僖請哀姜之喪已非矣以小君葬之更不可也

虞師晉師滅下陽

下陽號邑而言滅何也虞恃號號恃下陽下陽虞號
之塞邑也無下陽則無二國矣故言滅也首謀在晉

何以使虞主兵虞貪賂假晉道以伐虢且請先伐虢
故序晉上疾之也

秋九月齊侯宋公江人黃人盟于貫

左云服江黃也江黃近楚楚與國也楚爭衡上國則
江黃得議其後故服江黃者伐楚之要計也北杏之
會至此二十有四年諸侯服從迨江黃遠來而攘楚
之勢成矣故盟以結之惟宋與盟不煩諸侯也

冬十月不雨

此之不雨蓋自十月至夏五月每於時之首月書之者見僖之勤雨勤雨者勤民也自首月而已憂之知所重也

楚人侵鄭

三爭鄭也齊師不出慎之也

三年

春王正月不雨

夏四月不雨

閔雨也歷時則書之無一時而不汲汲也

徐人取舒

從齊令也徐已從齊矣齊伐楚必取道於徐及舒齊恐徐之中變也使之取舒所以絕徐於楚因以通伐楚之徑也舒國也變滅言取何也魯頌曰荆舒是懲蓋舒黨楚幾若楚屬邑矣故書取猶云取諸楚也罪舒而恕徐也

六月雨

喜雨也不雨屢書見公能憂民之憂雨而特書以是
為可同民之樂教人君以謹天災勤民事重國本也
秋齊侯宋公江人黃人會于陽穀

左氏云謀伐楚也去歲盟江黃以定其交矣今再會
以堅其約而始出其謀蓋使為犄角之援也江居新
息黃居弋陽皆在楚東南諸侯厚集於陘江黃屯守
其境楚師一出腹背受敵矣其不戰而來盟江黃與
有助焉然惜其不為江黃久遠計也管仲曰江黃遠

齊而近楚楚伐而不能救無以宗諸侯矣不數年而楚伐江滅黃君子益深為桓病之

冬公子友如齊涖盟

按左氏齊侯為陽穀之會來尋盟公子友如齊涖盟涖盟猶云身親其盟也內辭也蓋齊定計伐楚恐其謀泄故不煩諸侯而召其大夫以戒師期定約束隨其至之先後而命之泯衆會之迹故止書魯卿也

楚人伐鄭

鄭頻受楚師未聞齊救而傳載其臣之言曰齊方勤
我背德不祥然則齊必有使鄭足支楚以待大舉之
事而傳不詳耳

四年

春王正月公會齊侯宋公陳侯衛侯鄭伯許男曹伯侵
蔡蔡潰遂伐楚次于陘

楚猾夏久矣諸侯環視莫敢誰何獨齊奮而謀伐之
北威戎狄南固陳鄭徐舒既服江黃受盟而後大舉

其猷遠矣序七國之君見從之者衆也侵蔡者道所
必經且披楚黨也潰者民逃其上也軍威既振直舉
伐楚伐者明正其罪壯之也蔡微國也安用八國之
師蓋遠伐強楚勞師於道使楚得預為之備非計也
故陽為怒蔡潛師襲蔡隨出楚不意整師臨楚楚初
不及知後不及拒矣蓋伐楚其本謀而侵蔡為先聲
也徑楚地進而據險也次止也既讐以先聲復示以
形勢楚苟知懼可不戰而服倘其來拒彼曲此直勝

在此矣所謂節制之師也詳書之予之也

夏許男新臣卒

諸侯在師卒則書卒于師許男止書卒蓋陞近許疾而歸也

楚屈完來盟于師盟于召陵

屈氏完名楚大夫也伐楚為大舉楚之來者亦不得不詳之也師不出而完來楚服也書來盟于師著其情也楚子不出遽許完盟退之召陵而與盟焉夫以

諸侯而盟完恥也故完之來楚子使之也以自來為
文完之盟諸侯盟之也以自盟為文諱諸侯而病桓
也其執言也不敢責楚革僭號返侵疆恐激其怒而
決戰也其結好也不敢強楚子使來恐需之久而生
變也師退而楚乘齊釁圍許滅黃敗徐凡捨楚而從
齊者胥受荼毒焉蓋量齊師之不能復大舉也惟終
桓之世不敢侵鄭則攘楚之效耳王室賴以稍尊中
夏賴以少靖一匡之功固亦未可少也

齊人執陳轅濤塗

轅氏濤塗名陳大夫也齊道陳以伐楚及其還也濤塗畏齊師之復道陳以重病陳也說之還師濱海而東大陷於沛澤之中顧而執濤塗是濤塗有誤軍之罪矣然道陳而陳憂其病民豈所謂節制之師乎不返已而責人故稱人以執非伯討也

秋及江人黃人伐陳

齊命也以江黃遠國故命魯及之及不書名微者也

八月公至自伐楚

以伐楚致者侵蔡所以伐楚致其本事也

葬許穆公

冬十有二月公孫茲帥師會齊人宋人衛人鄭人許人
曹人侵陳

病齊桓也執之伐之而又侵之已甚矣諸侯方歸而
又勤之已亟矣公孫茲叔牙之子故於其帥師謹而
書之高閼曰書公孫茲帥師則知諸國皆大夫帥師

以會之矣皆貶而人之則公孫茲與貶可知矣而齊
其首惡也趙鵬飛曰明年陳侯與首止之會則陳服
也陳雖服豈心服乎

五年

春晉侯殺其世子申生

甚晉侯也莫親於父子莫重於世嫡而至於殺者溺
於色而蔽於讒也有國家而殺其世子未有不亂者
也晉侯殺申生里克殺奚齊又弑卓子夷吾獲於韓

原子圉死於高梁皆是故也女戎一興骨肉不能保
其生數世不能靖其亂抑申生之死可謂恭矣然而
不如其行也不然則明之也隱忍而死是陷親於不
義也董子曰有國家者不可以不通春秋前有讒而
不見後有賊而不知為人臣者不可以不通春秋守
經事而不知其宜遇變事而不知其權為人君父而
不通春秋之義者必蒙首惡之名為人臣子而不通
春秋之義者必陷篡弑誅死之罪若獻公者所謂前

有讒而不見故蒙首惡之名申生遇變事而不知權
是以不免於死而且陷父於不義

杞伯姬來朝其子

公羊傳曰與其子俱來朝也伯姬僖公之姑也於禮
不得歸寧來已非矣朝其子更非也父在子不當朝
借曰朝焉不必其母之朝之也杞任其來魯受其禮
參譏之

夏公孫茲如牟

據左氏公孫茲如牟娶焉如牟聘也君命也卿非君命不越境內大夫出境則書其所往重君命也不書娶私事不足書也

公及齊侯宋公陳侯衛侯鄭伯許男曹伯會王世子于首止

王世子襄王也書公及諸侯而殊王世子尊之也尊之者定之也世子母弟帶有寵於后王欲立帶而廢世子然王有其意而未有其事也故齊侯有定世子

之意亦不顯其事姑請於王而以會為名於是帥諸
侯會世子示共戴之而不可易則后之謀塞而世子
定矣齊侯之定世子義也惜其雜以權術幾於要君
也春秋書會王世子嘉其尊世子之意然以諸侯而
會世子於外亦以見要君之實功罪不相揜也王世
子不名別於諸侯之世子也世子無貶者非世子意
也或謂世子無王命而會諸侯夫世子出入一制於
王況失愛而恐懼之時乎若抗父出會則大惡矣何

得無貶齊桓公之盛烈曰尊周室尊周者莫大乎會
王世子故公及而列序諸侯辭繁而不殺也

秋八月諸侯盟于首止

書諸侯盟世子不與也諸侯不敢盟世子故自盟也
諸侯不序者一事再見前目而後凡也既會以定世
子又盟以固諸侯之心會以示義盟以立信尊周之
義於斯為篤矣

鄭伯逃歸不盟

左氏傳曰王使周公召鄭伯曰吾撫女以從楚蓋王惡齊定世子故命鄭無盟且將引楚以抗齊也鄭伯從王命耳何以書逃天王有命不行於諸侯而獨以命鄭乎鄭之從楚舊矣迫於諸侯而在會既乃託王命而先歸直書曰逃紀其實也逃者匹夫之行賤之也其從王命歟否歟非所知也故曰治春秋者不廢經而從傳

楚人滅弦弦子奔黃

楚復張也弦黃姻也江黃受盟於齊而犄楚楚今滅
弦所以威黃而侮齊也齊不能救弦而黃又受弦子
之奔楚之滅黃始此矣

九月戊申朔日有食之

冬晉人執虞公

此晉滅虞而執虞公也不書滅何虞滅久矣蓋自下
陽滅而虢因以滅虞亦隨之矣晉雖戎首實虞滅虢
以自滅也且滅者亡國之善辭上下同力也虞自滅

不足書滅也。虞稱公，天子之三公也。稱人以執討晉也。虞公不名，明其為公，義不繫於名也。不書以歸，若執之晉也。虞公昧於貨賄，貪以自亡。晉人取之如執一夫，見虞公之愚而不能有其國也。

六年

春王正月

夏公會齊侯、宋公、陳侯、衛侯、曹伯，伐鄭，圍新城。

討鄭之逃盟也。鄭貳於楚，以楚近而齊遠，近易伐而

遠之救難待也乃決計從楚齊率六國之師以伐之
所以固中國諸侯之心而折強楚憑陵之氣也伐而
圍邑將與宋圍長葛楚圍緡同歟非也伐以服鄭不
服斯圍之以六國之力圍一邑而不舉蓋志不在為
暴也而鄭罪著矣

秋楚人圍許

圍許以救鄭攻齊所必救也不書救鄭者楚與齊爭
鄭耳不足謂之救鄭也且許何罪而圍之乎故書以

著其背盟猾夏之罪

諸侯遂救許

諸侯不序蒙伐鄭也救許則鄭圍釋矣捨鄭以救許
是得恤患拯急之義也凡救皆善第書人者救不力
書次者救不勇舉諸侯則力也曰遂則勇也許賴以
存善之善也伐鄭之役齊不徵兵於許蓋留守其國
以備楚也齊計周矣其不能討楚之圍許亦畏其強
而不敢輕舉也

冬公至自伐鄭

致伐鄭者本謀也救許因伐鄭也故以伐鄭致

七年

春齊人伐鄭

救許而解鄭圍鄭猶從楚而未服也故復伐之書人者將卑師少也齊力足以制之不煩諸侯也

夏小邾子來朝

周武王封帝顓之後挾於邾為魯附庸挾之後有功

又別封其子於郕莊公四年郕黎來來朝今稱子何
休以為齊桓公白天子進之遂以爵通也稱小以別
於邾也

鄭殺其大夫申侯

申侯譖陳轅濤塗而諛齊齊賜以鄭虎牢又美城其
賜邑有取死之道矣背齊從楚則鄭伯之志不反已
而殺大夫以文過故著其專殺且明殺之不以其罪
也

秋七月公會齊侯宋公陳世子欵鄭世子華盟于甯母
左云謀鄭也鄭世子華與盟鄭將服而使來聽命也
鄭伯不自來慮見執也華謀藉齊以去其父之臣而
以鄭附齊是背父而為奸也齊拒之義也而猶許華
與盟終以懷鄭也是以鄭伯畏威而懷德卒至乞盟
也陳侯盟首止從伐鄭亦使世子來者陳侯在位四
十年矣蓋老而疾也

曹伯班卒

公子友如齊

自是公與友迭如齊朝聘於伯主勤矣

冬葬曹昭公

八年

春王正月公會王人齊侯宋公衛侯許男曹伯陳世子
欵盟于洮

按左氏七年閏月惠王崩襄王惡大叔帶之難懼不
立不發喪而告難於齊八年春盟于洮謀王室也定

位而後發喪考之經文冬十二月丁未天王崩則八年春天王尚在也秘不發喪或取權於旬月者有之矣不可以經年且叔帶母弟更難以秘喪欺也然以王人受命與諸侯盟諸侯盟王人而均無譏則王室之有難諸侯之同獎王室可知矣王人下士也序於方伯諸侯之上尊王命也

鄭伯乞盟

書乞盟鄙之也有前之逃不得不出於乞也乞盟不

言使大夫親至會也然則得與盟乎曰觀次年葵丘得與則此盟得與可知矣乃不序而別言之者賤鄭伯之不明大義而輕於去就也

夏狄伐晉

乘晉亂也世子殺公子亡國內不協故狄乘之釁起房帷變生敵國可畏哉

秋七月禘于大廟用致夫人

夫人左以為哀姜是也致者致其主於廟也哀姜薨

八年矣今始致何也蓋以罪致討雖殯葬如禮然疑而未祔於廟今因禘而卒致之非禮也

冬十有二月丁未天王崩

志崩不志葬魯不會也

九年

春王正月丁丑宋公御說卒

宋桓公也輔齊以圖伯凡安內攘外之事無不從也滅小降弱之事未嘗與也亦賢君哉不書葬不往會

也

夏公會宰周公齊侯宋子衛侯鄭伯許男曹伯于葵丘
襄王初立惠后猶在叔帶伺釁桓請王命而會諸侯
王亦出重臣以臨之而奸謀戢矣然桓果能帥諸侯
以朝王而聽命焉天王自尊叔帶不足慮矣乃於衰
經之中而講會盟非禮也遠致天子之宰於葵丘非
度也北伐山戎南伐楚西為此會名為尊王實圖伯
而已矣宰周公以冢宰而兼三公也不殊會之者宰

周公亦人臣耳非世子儲君比也宋子宋襄也喪未踰年故稱子背殯出會非禮也君子不奪人之喪亦不為人奪其喪齊侯宋子皆過矣

秋七月乙酉伯姬卒

伯姬不稱子公姊妹也內女為夫人繫國不繫國未適人也何以書卒許嫁於諸侯也許嫁不為殤也

九月戊辰諸侯盟于葵丘

書諸侯盟周公不與也陳傅良曰桓於洮之會序王

人於諸侯之上而同盟焉於葵丘序宰周公於諸侯之上而不敢同盟焉於首止不敢盟世子且帥諸侯以會世子焉桓知節矣是也夫自再盟幽而諸侯協治戎却狄帖楚而列國安會首止及洮而王室寧至葵丘而伯業盛矣經於其事而以恒辭書之不震其功而律以禮以王道治之也

甲子晉侯詭諸卒

公羊作甲戌

晉侯外滅人國內殺其嫡身歿而亂宜哉

冬晉里克殺其君之子奚齊

嗣子遇弑雖未逾年稱君齊舍是也舍正也此書君之子何非正也不當立而奪嫡也不書弑不成君也十年

春王正月公如齊

魯始朝齊也宗國且然他國可知矣諸侯諂伯主肆故書之以傷王室之日微也

狄滅溫溫子奔衛

溫在王畿狄滅之無王甚矣齊桓若不聞焉深責齊也

晉里克弑其君卓及其大夫荀息

卓亦庶也書弑者正其為里克之君也里克好勇而不知義當申生之被讒以死也不能爭而欲以中立苟免申生既死君立奚齊矣里克悍然不顧君臣之義而殺之然猶云有奪嫡之嫌也今荀息立卓則又弑卓其無君而怙亂也甚矣故成其君臣之名以正

其罪前書殺其君之子繼書弑其君深罪里克也荀
息從君於昏而書及書官者能守信以死君難視苟
免者猶愈焉

夏齊侯許男伐北戎

時狄益熾禍及王畿不此之懲而伐北戎所謂不務
德而勤遠略乎況許近楚有楚患驅之北伐非義矣
齊桓自召陵以後其志日驕故逐小利而遺大計也
晉殺其大夫里克

里克弑君乃稱國以殺而不去其官者晉惠不以賊討之而祇恐其不利於己也惠公賂以求入里克實迎立焉惠公固幸卓之死而竊其位但見克弑二君易若反掌又疑其志在重耳而不在己故殺之則殺之私也春秋推見至隱故以專殺之罪罪之懷私以討克雖死不服也

秋七月

冬大雨雪

周之冬酉戌亥月也總三月而大雨雪失時也且恒寒為災故志也

十有一年

春晉殺其大夫平鄭父

平鄭里克之黨也晉惠公賂里克以有晉復以私殺之卻芮贊君以報私怨其濫刑也皆以行其私也故稱國以殺而不去其官君與用事大夫同責也

夏公及夫人姜氏會齊侯于陽穀

夫人聲姜也逆至不書得禮也姜為齊侯之女歸寧可也與於會不可也書公及夫人婦從夫之辭與文姜異矣然禮謹於微其防一潰其流遂不可禦書之以明別遠嫌使人知禮法之大閑也

秋八月大雩

僖公初政勤於為民故雨不雨備書之今之夏方挾夫人與齊為陽穀之會志不在民矣旱至八月而雩亦具文耳觀春秋書法而僖之始勤終怠具見矣

冬楚人伐黃

為其從齊也盟貫之初不敢伐者齊勤也召陵之後
反伐之者齊怠也方寸之敬肆千里之外見之矣書
曰無怠無荒四夷來王

十有二年

春王三月庚午日有食之

不書朔官失之

夏楚人滅黃

滅不書伐此特書之者見被伐久矣告問已至而齊不救以至於滅也江黃小而近楚既慕義而從齊矣楚憤而滅之齊坐視而不之救其志荒矣書之以閔黃惡楚而深責齊也不書出奔亦不書以其君歸胡安國謂國滅君死於其位得正焉而斃於禮為合於時為不幸者是也

秋七月

冬十有二月丁丑陳侯杵臼卒

十有三年

春秋侵衛

以衛納溫子也狄滅溫矣溫子奔衛狄尚欲得而甘心焉亦橫甚矣戎亂王室楚滅弦黃狄滅溫而侵衛復侵鄭淮夷病杞由桓失伯職也驕心一生戎馬四起可畏哉

夏四月葬陳宣公

公會齊侯宋公陳侯衛侯鄭伯許男曹伯于鹹

左氏傳云淮夷病杞故且謀王室也然則為杞者諸侯之本計其勤王祇兼及耳失重輕之衡矣故傳雖有致戍之事而經不書趙汭曰狄滅溫而不能救也戎犯京師而不能斥也而相與致戍方伯所以蕃王室者如斯而已乎戍周不書不足書也

秋九月大雩

冬公子友如齊

陽穀之後友如齊而伐楚甯母之後友如齊而盟洮

賊之後友如齊而城緣陵志專政也

十有四年

春諸侯城緣陵

左云城緣陵而遷杞焉不書其人有闕也夫一事再見而不序者前目後凡也此即會賊之諸侯也然夏會而春城無三時止賊之理蓋再會也非前目後凡之例矣桓德既衰命諸侯城之而為德不周故再會而不序略之也

夏六月季姬及鄆子遇于防使鄆子來朝

左氏傳云鄆季姬來寧公怒止之以鄆子之不朝也
夏遇于防而使來朝季姬不繫鄆絕之於鄆也姬聞
鄆子有事過防邀而遇之因使之朝也蓋前此杞伯
姬來朝其子矣魯以故而怒鄆子之不朝非不以禮
自處復不以禮處人者乎以怒而絕昏於鄆鄆子本
不朝而使於其婦皆非也惡魯而賤鄆子也

秋八月辛卯沙鹿崩

沙鹿山名山崩變之大者故志之日食星隕山川崩
竭繫之天下有天下者之責也諸侯有土則境內山
川守土者固亦不得辭其責沙鹿崩而天王出居其
山在晉而晉侯見獲有天下國家者在謹人事慎所
感而已

狄侵鄭

狄在西北今侵衛而至於鄭幾與楚合矣鄭天下之
中也楚禍南至狄禍北來楚狄交橫而齊不一救益

以見桓公之志不在諸侯也

冬蔡侯肸卒

獻舞之子也父獻舞獲於楚而卒肸立而堅於從楚齊桓公之伯也雖國潰而終無從伯之志君子深惡其忘父事仇下喬入谷也

十有五年

春王正月公如齊

十年公如齊今閱五年又如齊夫五年一朝所以事

天子也魯行之齊受之均罪也

楚人伐徐

楚滅黃齊不救楚遂揚兵伐徐向之從齊以病楚者
楚悉攻之無齊也有以窺齊桓公之志怠而不能救
也

三月公會齊侯宋公陳侯衛侯鄭伯許男曹伯盟于牡
丘遂次于匡公孫敖帥師及諸侯之大夫救徐

徐近齊勢不得不救會諸侯救之可矣先盟之不協

也既盟而次徒張虛聲幸楚之退其救之不力可知也諸侯在會而使大夫救之不成為救也桓德益衰諸侯益離而大夫遂專政也救衛無功而王命不行救徐無功而伯令亦不行矣公孫敖慶父之子也友帥師茲帥師教帥師三家之盛所由來矣

夏五月日有食之

不書日與朔官失之

秋七月齊師曹師伐厲

左云伐厲以救徐也徐無罪而楚伐之厲復何罪而齊伐之乎同為暴也是悖乎理也形格勢禁者攻其所必救而厲非楚所必救也是愖於勢也齊悖理矣豈愖於勢乎蓋不敢當楚而無辭於徐姑分師以伐厲名為救徐實避楚也齊師既移諸侯之大夫無固志而楚益無忌也

八月螽

頻旱又螽志災以閔民也

九月公至自會

公以九月至則知齊曹伐厲而諸侯皆歸矣以會致者救徐無功也

季姬歸于鄆

內女初嫁曰歸來寧而返亦當曰歸常事不書也此書之明中絕也

己卯晦震夷伯之廟

朔晦必書月之始終也震者天之威怒也夷伯魯大

夫也劉敞曰夷氏也左以夷伯為展氏則夷為展氏之謚非也雖貴卿必繫字於氏原仲高子皆繫氏臣無舉謚於君側者也是也伯字也臣既卒矣舉字者史文也夷伯之廟震而書震夷伯之廟者必人為有以感之而天應之也君子知天之日鑒而畏其威所以事天也

冬宋人伐曹

齊伯至此三十餘年諸侯無擅以兵相加者今桓德

衰矣雖同盟之宋且叛齊伐曹以修怨焉夫曹於莊
十四年從齊伐宋乃伯討耳且有陳焉事又易世今
乃修怨乎蓋乘齊衰而圖伯也圖伯而首壞盟以虐
與國更出齊桓下矣

楚人敗徐于婁林

以八國之衆不敢敵楚卒使徐敗伯業之隳怠荒乘
之也

十有一月壬戌晉侯及秦伯戰于韓獲晉侯

重耳夷吾同出而夷吾弟也不當立而賂以求入篡也秦利其賂而納之貪也以公言之均罪也夷吾背秦惠三施無報以來秦師又不以禮下之而遽與之戰以私言之則秦直晉曲矣故以晉及戰深罪晉也韓晉地戰不言伐戰於晉地伐不待言也經書戰而君獲惟此賤之也不書以歸穆姬請而釋之也劉敞曰君獲不言師敗績君重於師也黃仲炎曰秦以爵書無吳楚之僭也



御纂春秋直解卷五上

欽定四庫全書薈要卷一千八百三十六

經部

御纂春秋直解卷五下

十有六年

春王正月戊申朔隕石于宋五。是月六鷁退飛過宋都。
星隕至地為石。莊七年書星隕本其上而言此書隕
石據其下而言。後數散辭也。散隕宋境計之乃得其
數。故繫以五鷁退飛風驅之也。先數聚辭也。羣飛而
過宋都。舉目即得其數。故冠以六隕石不言星鷁退。

飛不言風皆本其可見者而言石鷁人所共見其為星為風則非所見也謹物異以念庶徵也

三月壬申公子季友卒

季氏之始也友名季其行次也大夫卒書名其兼書行次者季友仲遂叔肸三人而已友為僖之叔遂為宣之叔其行次先君之行次也肸為宣之弟其行次今君之行次也序行次者其君所厚喪有加禮也友忠也書公子肸賢也書公弟遂逆也則削其公子矣

春秋錄善癉惡故其辭異胡傳以季友仲遂為生而
賜氏俾世為卿夫世卿多矣獨友與遂乎

夏四月丙申鄆季姬卒

秋七月甲子公孫茲卒

公子牙之子也是為叔孫氏

冬十有二月公會齊侯宋公陳侯衛侯鄭伯許男邢侯
曹伯于淮

淮夷病鄆桓為會以謀之且博東略之名也既而城

鄆不果則其志益怠而伯業益衰矣許以男而先邢
曹邢以侯而後鄭許非禮也邢未嘗與齊會盟意欲
伐衛故自請從會以求親於齊乎

十有七年

春齊人徐人伐英氏

報楚婁林之役也楚敗徐而英氏受兵可乎

夏滅項

內滅國諱書取此書滅何公在會也然則孰滅之執

政者滅之也友卒而公任仲遂為政後此如楚乞師
帥師入杞者皆遂也意此亦遂為之乎春秋為君諱
尊之也不為臣諱責之也

秋夫人姜氏會齊侯于卞

齊侯歸自會道由乎魯夫人會之於卞前此陽穀之
會猶從公俱出今公未至而夫人獨出非禮甚矣左
云公以滅項為齊所止夫人會齊侯請而釋之然考
之於經繼書公至不云自齊而云自會安在其為見

止乎如使見止雖諱其名不應沒其實此傳者之辭
未足據也

九月公至自會

會淮而返飲至於廟也公與齊會淮齊伐英氏而公
經略淮夷魯頌所詠其即此歟

冬十有二月乙亥齊侯小白卒

周道陵夷齊桓創伯以尊王安攘為事一匡之績聖
人之所許也然五伯者三王之罪人則桓公者功之

首而亦罪之魁歟且一人之身前後頓異管仲相則治三豎用則亂蓋桓本中才志在功利其始也屈已糾合以成伯業既而志得欲從遂至驕怠卒之溺於內嬖繼嗣不定身沒而亂非不幸也

十有八年

春王正月宋公曹伯衛人邾人伐齊

伐齊以納公子昭也桓無嫡而無虧為長齊人立無虧昭奔宋左云桓與管仲屬昭於宋襄以為太子故

宋納之夫桓自立其子何藉於宋蓋宋襄前已伐曹以爭伯今因昭奔宋因誣曰桓嘗屬之故伐齊以納昭昭立則齊從宋天下孰敢不從宋是撓齊而巧於求伯也春秋推見至隱不書納而書伐以為宋志非納也直伐喪以亂齊而已矣故書以深惡之曹衛邾從宋為宋欺也

夏師救齊

諸侯非王命不得擅興師然用之於救猶有取焉急

鄰難也況齊前使高子定魯而可不報之乎書以善救而伐者之惡愈見矣

五月戊寅宋師及齊師戰于贏齊師敗績

此宋公也變文稱師者用衆為暴則師為重也穀梁曰戰不言伐客不言及蓋伐與戰均罪也書戰而伐可知矣今宋戰矣而先書伐以惡宋也凡受伐者有辭宜以禮諭之無辭宜以禮下之不能諭不能下則戰矣是戰成於受伐者也故客不言及也今以宋及

何也宋既脅殺無虧而四公子與昭之長幼猶當辨也宋仍必欲立昭則此戰宋實尸之故首宋也書敗績憫齊也桓公之澤斬矣曹衛邾從宋魯救齊不序於戰者略之也

狄救齊

予救也苟有善雖狄必予之齊師既敗狄救無及矣苟為善雖無功必予之勸善之心無已也

秋八月丁亥葬齊桓公

九月始克葬亂故也

冬邢人狄人伐衛

衛從宋伐齊罪也然邢不早出師救齊乃結仇讐而伐同姓可乎狄稱人便文爾救齊無功移師於衛是仍前入衛之志穀梁曰進之誤矣善救齊而惡伐衛進退之權無成心也如此

十有九年

春王三月宋人執滕子嬰齊

滕非有罪也宋圖伯而首執國君以立威又不歸之
京師故稱人以罪之至孟之會而已亦受執也出爾
反爾信哉諸侯卒書名名者終事也執而不返終於
執矣故亦書名

夏六月宋公曹人邾人盟于曹南

曹南曹國之南也此宋約曹邾盟也乃不地而于曹
南者曹未服也迫於宋而勉從之故方出國都而盟
是要盟也

鄆子會盟于邾已酉邾人執鄆子用之

曹介宋邾之間既盟宋公南歸邾子東返邾又東則
鄆鄆子因盟來會後期至邾故書會盟于邾邾人執
之者意與鄆有怨因宋憾鄆留鄆子而請於宋宋命
執而用之耳左云用之於次睢之社以屬東夷同為
國君而用若犬豕尚有人理乎然不書宋使何宋召
盟而邾用之邾承宋命可知且陷鄆子者實邾也杜
預曰以邾用為文者南面之君善惡自專不得託於

他命是也鄆子不名史失之

秋宋人圍曹

曹雖與盟而猶未服宋自省德可也乃輕動干戈甚
至圍其國都乎半年之間執滕用鄆圍曹暴且急矣
伯猶假仁此則真不仁哉

衛人伐邢

衛不反已而復怨且舍狄而伐同姓故罪之

冬會陳人蔡人楚人鄭人盟于齊

會者誰公也首陳何也左云陳請修好於諸侯以無忘齊桓之德也夫不忘桓德請於桓之舊盟可耳何援楚而入之盟是知陳之請楚之謀也楚列齊盟自此會始蔡舊從楚鄭新從楚皆楚黨也齊棄先志延之國都而與之盟紊中外之防而為諸侯患故於此諱公而人諸侯謹之於始也

梁亡

梁伯好土功輕民力虐用其民疲而內潰非有侵伐

而滅之者故以自亡為文國滅聖人之所傷惟自亡者雖亡有餘責焉書曰用顧畏于民若懼自亡也

二十年

春新作南門

南門天子五諸侯三言新有故也作則有加其度矣
春則非時矣

夏郃子來朝

趙鵬飛曰郃滅久矣隱十年公敗宋師取郃即其地

郕文之昭也與魯同姓意宋滅之而魯封之乎然不見於經諸姬之存者僅矣書之益傷之也

五月乙巳西宮災

西宮小寢也災則書無微而不當謹也

鄭人入滑

滑嘗同盟於幽又在畿內而鄭入之故書以罪之
秋齊人狄人盟于邢

於是衛病邢益將為邢謀衛也齊桓之伯也北伐戎

而南伐楚齊孝之立也南盟楚而北盟狄不予矣邢
屢比狄而謀衛失計矣

冬楚人伐隨

楚加兵於隨屢矣不見於經者告命有缺也既引之
同盟故假告命為恐動諸侯之計

二十有一年

春秋侵衛

侵衛為邢也然適足速邢禍耳書以責邢結外援殘

同類而卒以自殘也

宋人齊人楚人盟于鹿上

左氏曰宋人為鹿上之盟以求諸侯此盟本宋公也而稱人者圖伯而求楚與之同盟自取敗辱不足為伯也齊與盟何也宋挾齊為重齊孝公屈於立已之德不得已而從之故首宋也以是知宋襄立昭之心矣一立昭而齊楚咸居宋下不居然伯乎不知楚蓋姑與之而陰圖之而宋不悟何其愚也

夏大旱

旱經時久也大則甚也

秋宋公楚子陳侯蔡侯鄭伯許男曹伯會于孟執宋公以伐宋

鹿上之盟楚許宋以諸侯故會以定之宋不足主會而首宋者楚陽推之也諸國皆後楚名為伯宋實伯楚也宋與諸國皆稱爵者荆蠻陵諸夏而執會主其變為大不得不詳之也楚書子正名也宋所恃惟齊

而齊不至陳蔡鄭許皆楚黨曹又宋仇也見執於楚
宜矣不書楚執者諸侯在會拱手以聽分惡於諸侯
也以伐宋甚之也非公子目夷宋不幾亡乎然則宋
公之罪愈不容揜矣與僭王之楚會盟且下求焉德
不足懷慮不及遠辱身敗國宜哉

冬公伐邾

楚執宋公諸夏之恥乃間之而伐邾乎書以病公也
楚人使宜申來獻捷

楚人蓋楚子也烏乎捷捷乎宋也來獻者威魯也古者諸侯獻四夷之捷於王王以警於夷今楚乃以捷於中國者警中國乎魯不能正辭拒楚故捷不言宋為內諱也

十有二月癸丑公會諸侯盟于薄釋宋公

此會孟之諸侯也薄宋地諸侯從楚伐宋已踰時矣猶在宋地復從楚盟是諸夏胥從楚矣書會諸侯而不書會楚者不與楚專釋以存中國也會盟同日者

盟非預約公畏威而來即會即盟也盟而即釋楚威
已伸盟與釋惟楚意也宋公不言歸而言釋自投陷
甯賴人而釋無歸道也諸侯復歸猶書名此不名者
未失國也

二十有二年

春公伐邾取須句

按左氏邾人滅須句公伐邾而反其君須句風姓太
皞之裔也既反其君矣曷以滅國罪之蓋使為魯附

庸也則是魯取之耳陳傅良曰春秋嚴義利之辨苟以為利雖反其君書取也

夏宋公衛侯許男滕子伐鄭

宋公釋於楚當悔過自入乃怒鄭朝楚遽伐鄭以致楚何不自量之甚也三國猶從宋者懼楚之暴而欲中國之有伯也

秋八月丁未及邾人戰于升陁

及者公也內戰不書敗書戰即敗也傳曰邾人獲公

胄懸諸魚門是魯敗也記曰邾婁復之以矢自戰于
升陘始也邾亦敗也不書公不書敗為內諱也是知
取須句非興滅之公矣

冬十有一月己巳朔宋公及楚人戰于泓宋師敗績

以宋及戰深責宋也不知義而妄戰殘民命以圖雪
恥其致敗也宜矣汪克寬曰宋公身傷不言宋公敗
績猶為宋諱若鄢陵之戰直書楚子敗績矣楚子救
鄭不書救又稱人微之也亦惡之也

二十有三年

春齊侯伐宋圍緡

宋敗於泓楚益張矣齊侯無志於攘楚而救宋則已
昧於大義矣今更助楚為虐故書伐書圍以重其罪
夏五月庚寅宋公茲父卒

傷於泓故也魯畏楚而不會故不書葬也

秋楚人伐陳

左云討貳於宋也自曹南之盟陳不從宋其後盟齊

會孟伐宋亦並從楚未見貳於宋也據傳楚子玉城
頓而還意頓舊屬陳楚蓋伐陳以爭頓耳

冬十有一月杞子卒

二十有四年

春王正月

夏狄伐鄭

據左氏鄭伐滑王使如鄭請滑鄭不聽而執王使王
怒出狄師伐鄭鄭雖當討用狄則非不書王命者諱

王之啟寇以滅親也不使狄之假命以猾夏也尊王而諱之惡狄而正之愛中國而存之意深哉

秋七月

冬天王出居于鄭

避子帶之難也襄王之為世子以母后寵弟帶而幾廢及帶招戎奔齊王猶反之帶乃搆狄攻王是不能制之以義早為之所畀頽叔桃子以招狄之柄而假之羽翼以及於難書出言自棄宗社也諸侯以非道

出曰奔天王以非道出曰居明無外也侯國皆其有
莫非王土也于鄭者圖於鄭也怒鄭而使狄伐之怒
狄而與鄭圖之比事以觀失自見矣

晉侯夷吾卒

秦納重耳入立不書不告也

二十有五年

春王正月丙午衛侯燬滅邢

春秋書滅國多矣滅同姓者亦不一矣衛侯何以名

尤惡其挾詐也左氏云衛將伐邢禮至曰不得其守國不可得也我請昆弟仕焉乃往得仕衛伐邢二禮從國子廵城掖以赴外殺之遂滅邢葉夢得曰滅國之罪不待貶而見春秋之義常致意於所難察故殺蔡侯名楚子惡誘殺人之君也滅邢名衛侯惡誘滅人之國也

夏四月癸酉衛侯燬卒

文公再造衛詩載定之方中規模遠矣齊桓之伯無

役不從晚從宋襄伐齊伐鄭已又滅邢耄而荒矣

宋蕩伯姬來逆婦

蕩伯姬魯女而歸蕩氏者也姑逆婦非禮也何以書公主之也亦非禮也

宋殺其大夫

罪專殺也不名史失之

秋楚人圍陳納頓子于頓

頓子迫於陳而奔楚故楚納之陳信有罪矣諸侯不

救而假楚以廢置之權以圖示威以納示德楚之勢
於是成矣

葬衛文公

冬十有二月癸亥公會衛子莒慶盟于洮

莒以季友獲挈之故與魯絕衛文公嘗欲平之故衛
為此盟莒子疑魯未肯平乃以大夫聽命衛稱子未
踰年也

二十有六年

春王正月己未公會莒子衛甯速盟于向

申洮之盟也莒子來信之也公復會勤莒也衛知魯莒可平故不再出而使大夫也洮向二盟莒衛竟以大夫敵公非禮也然不諱公者猶以釋怨許之也齊人侵我西鄙

孝公以爭國與魯有隙其盟於齊怨已釋矣乃因衛莒之盟潛師為暴至夏又伐魯北鄙比書之罪自見矣

公追齊師至鄆弗及

侵稱人舉將也追稱師明衆也鄆齊地敵至不能應去始追之無備也敵既出境追而至鄆深入也將及之矣畏衆而反又何怯也魯之軍政如此其謀國疎矣

夏齊人伐我北鄙

衛人伐齊

洮向之盟故也然洮向以釋怨顧乃報怨以結怨乎

春秋明大義不貴小諒書以罪衛也

公子遂如楚乞師

乞重辭也又卑辭也已之師不以義動猶不可況人之師乎軍政不修求援友邦已非立國之道況下求荆蠻乎齊雖無道乃引楚以殘甥舅之國非義也示弱啟侮且使楚禍遠及於齊非謀也

秋楚人滅夔以夔子歸

祀不過祖夔祖熊摯楚乃以不祀祝融鬻熊責夔乎

夔以正對而楚終滅之貪其地耳滅國為大惡況同
姓乎況無罪乎抑夔上游之國也夔滅則通於巴蜀
楚益富強春秋所懼也夔子不名史失之

冬楚人伐宋圍緡

宋為望國楚忌之必欲翦滅而後已書伐書圍著其
橫也

公以楚師伐齊取穀

魯乞師於楚楚利得魯以師赴之魯倚楚得齊邑公

自以為得計矣不知倚楚必事楚事楚者以國與楚也
以國與楚而博齊之一邑可謂不知類矣

公至自伐齊

不義而反以為功告至策勲危之也受德於楚結怨
於齊楚將責報無已齊亦將報怨無已向非晉文之
伯魯其危哉

二十有七年

春杞子來朝

夏六月庚寅齊侯昭卒

孝公乘亂爭國盟楚狄而伐宋魯雖席父威而卒不振宜哉

秋八月乙未葬齊孝公

乙巳公子遂帥師入杞

左氏云責無禮也伯姬託其子於魯今嗣位來朝執禮恭矣而師入其國憑弱犯寡已實無禮何以責人遂帥師惡專也乞師伐齊帥師入杞東門氏之惡兆

於此

冬楚人陳侯蔡侯鄭伯許男圍宋

楚主兵故首楚此楚子也而稱人抑之也四國稱爵而列其下罪從楚也前圍邑今且圍國志必滅宋也十有二月甲戌公會諸侯盟于宋

圍宋而盟約久圍也圍宋則宋公不與審矣何以書盟於宋蓋盟於宋之國外不可別言地也公初不與圍以受楚惠且畏其威故往會沒楚子而書會諸侯

諱公惡也是時諸侯從楚者幾半天下伐齊圍宋勢
益岌岌焉微城濮之戰天下尚可問乎春秋是以不
沒桓文之功也

二十有八年

春晉侯侵曹晉侯伐衛

晉侯者重耳也楚伐齊而圍宋宋告急於晉狐偃曰
楚得曹婚衛伐曹衛楚必救之則齊宋免矣其侵與
伐皆以致楚也兩書晉侯者侵曹既反而後伐衛蓋

兩事也不書救宋者據事書之謀隱而事著也

公子買戍衛不卒戍刺之

晉伐衛而魯戍之從楚令也公懼晉乃殺買以免而告楚人曰不卒戍也誣殺以說晉詭辭以說楚持兩端以觀勝負得免伯討幸爾刺傷也諱專殺而輕其辭也

楚人救衛

凡書救多善此以衛附楚而楚救之非善楚也病晉

也衛附楚可罪求盟亦可免而晉弗許以衛為楚所必救志在致楚也謀雖工而道則小矣

三月丙午晉侯入曹執曹伯畀宋人

晉伐衛以致楚楚分師以救衛尚未肯釋宋悉師而來也挫其偏師使知難而退則楚未大創未可制也因移師臨曹入其國而執其君且以畀宋則楚不得不悉師一決所以成城濮之功也然入曹暴矣執曹伯無禮矣不歸京師而畀宋人非義矣

夏四月己巳晉侯齊師宋師秦師及楚人戰于城濮楚師敗績

此戰宋公在焉獨爵晉而三國稱師者予晉伯也蘇轍曰春秋書始得諸侯者好會稱人兵會稱師是也晉及戰晉志也書楚師敗績見其用衆為晉所致也趙鵬飛曰晉文功與齊桓同而勢則異桓難於合諸侯而易於制楚文難於制楚而易於宗諸侯桓之興諸侯未識所謂伯必屢會屢盟而後服其時楚方張

侵伐不出蔡鄭故久而後問其罪期於服而已文之興諸侯習於從伯一揮而至矣然楚之強非曩時比師臨齊宋之郊自東以南皆楚矣非大勝之無以奪其氣而定諸侯之心文一戰而伯可謂一時之偉績矣

楚殺其大夫得臣

戰稱人略之也惡猾夏也殺書官書名詳之也惡專殺也得臣有罪楚又自外於王化猶不與其專殺者

天子之治無外也

衛侯出奔楚

懼晉也使元咺奉叔武以守未有二君故不名晉敗楚功也執曹伯出衛侯罪也功罪不相揜也

五月癸丑公會晉侯齊侯宋公蔡侯鄭伯衛子莒子盟于踐土

同獎王室也晉侯序齊侯宋公之上伯業定也齊先宋以強弱為次也魯衛附楚蔡鄭從楚圍宋莒則與

魯衛為好者也一勝楚而皆至矣衛子叔武也武奉命攝位宜書弟或書字今稱子且序莒上是晉文立之也武不敢以成君自居降而稱子子者世子嗣位而未成君之稱非其名矣莊二十七年王命齊桓為伯此亦命晉文為伯皆不書者二公非實能尊王以盡伯職故削之也

陳侯如會

陳服也來不及盟故書如會不再盟不瀆也

公朝于王所

諸侯朝王於京師巡狩則於方岳曷為言王所非其所也來踐土而勞晉也不書勞晉全天王之尊也公朝則諸侯皆朝可知第晉不能帥諸侯以朝京師伉也諸侯因晉召盟而始朝怠也故削之而止以公朝見意焉胡安國曰春秋不以就朝為非而以非其所為貶正其本之意也

六月衛侯鄭自楚復歸于衛

晉不早復衛侯懼而出奔奔不名罪晉也今名之失國也且以其自楚歸也

衛元咺出奔晉

為殺武而訴於晉所訴雖直然亂君臣之分矣

陳侯款卒

秋杞伯姬來

為杞謝過也兩國之好婦人通之非禮也

公子遂如齊

伯姬來入杞之怨釋遂如齊取穀之憾消伯權立而諸侯不敢私用兵也

冬公會晉侯齊侯宋公蔡侯鄭伯陳子莒子邾子秦人于溫

左云討不服也從楚圍宋者四國獨許未服故謀討之陳稱子居喪也踐土之盟使衛之臣奪君位溫之會使陳之孤奪父喪非禮也秦始與會睦於晉也

天王狩于河陽

是晉侯召王以諸侯見也變文書狩若王之時巡焉
尊之也溫在河陽書河陽大之也諱就諸侯於溫也
春秋尊王而全其名所以明王道也果其省德修政
安見東周不可為乎聖人尊周而欲興之無所不致
意焉

壬申公朝于王所

河陽密邇周京不朝京師而於河陽褻矣是晉令也
晉於一年之中兩帥諸侯以朝雖朝禮未盡春秋猶

有取故河陽書狩尊周也亦全晉也

晉人執衛侯歸之于京師

元咺訴故也君臣無獄乃為臣執君乎歸之于京師者緩辭也自治其獄獄定而歸之專擅甚矣且衛禍成於晉逐衛侯立叔武使兄弟相疑彼元咺亦窺晉惡衛侯而訴君耳

衛元咺自晉復歸于衛

諸侯之國世守之故可言復大夫之位君命之不可

言復言復者抗辭也書自晉深罪晉也

諸侯遂圍許

諸侯不序蒙溫之會也遂繼事也圍宋之役許實從
楚踐土會盟許復不至是其自取云爾

曹伯襄復歸于曹遂會諸侯圍許

晉釋之也何以名晉侯疾曹伯貨筮史以復曹也劉
敞曰衛侯以殺叔武名曹伯以賂反國名其惡不同
其貶一也是也

二十有九年

春介葛盧來

介國名葛盧其君也名之未命也書來者不能行朝
禮略之也

公至自圍許

圍許逾年不能服以圍許致者溫之本謀紀實也

夏六月會王人晉人宋人齊人陳人蔡人秦人盟于翟

泉

謀伐鄭也晉文召王而朝受訴執衛因疾復曹諸侯
其窺之矣故許不服而鄭亦貳不自反而謀伐之晉
志驕矣諸侯同盟王官蒞之不與盟也洮之盟王人
始與焉然猶敵諸侯也今則大夫敵之矣胡安國曰
翟泉近在王城之內而王子虎下與國卿盟是謂上
替國卿上盟王子是謂下陵故國卿貶稱人而王子
亦與焉端其本之義是也公與盟而不能正其失故
諱不書公

秋大雨雹

雨雹以大為異且害稼而為災也不書月日史失之
冬介葛盧來

春來公在外故又來非修禮也蓋將假道以侵蕭耳
三十年

春王正月

夏狄侵齊

晉文之為公子也在狄久狄恃其寵故敢乘間而侵

齊晉方主伯以安攘為事置狄不問非義也

秋衛殺其大夫元咺及公子瑕

衛侯未入而殺元咺稱國者衛侯賂周治而殺之也
咺罪當誅而書官衛侯志在入國非明正其罪也瑕
則咺所立也書公子不予咺之立君書及見罪起元
咺也意瑕尚幼而咺立幼以擅國乎則瑕無罪也而
衛侯賊殺其親之惡著矣

衛侯鄭歸于衛

歸不言復絕之也始歸而殺武再歸而殺瑕是長惡不悛雖得國而義不可以有國也不書自京師制在晉也趙鵬飛曰書歸于衛則命不係於王而權亦不歸於晉使若衛侯之自歸也

晉人秦人圍鄭

翟泉謀討鄭討而圍國暴也不見德而惟虐是聞而秦助其虐故皆稱人以貶之圍鄭不服伯業衰矣且約秦非計也秦虎狼之國導之使見諸夏之弱而有

雄心釁起入滑禍延數世而不已則晉文之過也

介人侵蕭

再來魯而遂侵蕭惡介且罪魯也

冬天王使宰周公來聘

襄王以晉文兩合諸侯而朝之遂以三公下聘蓋因聘晉而歷聘朝王之諸侯非特聘魯也禮雖有王聘之文然必諸侯朝而後王有聘魯兩朝王所因晉而就朝非能朝也王不能正王法而下聘所使者又以

冢宰而兼三公王室陵夷大臣失職亦甚矣

公子遂如京師遂如晉

公不入覲以拜王命之辱乃使陪臣報聘且如京師如晉以二事出是夷周於晉也春秋書遂若大夫之專事者為魯諱惡且尊王也李廉曰此與成十二年公如京師遂會伐秦書法相似此本以二事出春秋則以如晉為遂事不敢以王事同伯事也彼本以伐秦出春秋則以伐秦為遂事不敢以伯事先王事也

三十有一年

春取濟西田

外田必繫國不繫國魯故田也何以書取晉侯入曹班所侵地於諸侯魯於是取濟西田則是介晉力也鄆謹龜陰田復之以禮故曰歸濟西田與汶陽田皆返之以力故曰取雖返故田而不以道與力奪人田者同科若曰取非其有者耳

公子遂如晉

拜取田也周以禮聘晉以利啗一如周而再如晉知伯不知王知利不知義矣

夏四月卜郊不從乃免牲猶三望

王以冬至祀上帝又以夏之孟春祈穀於上帝禮行於郊故曰郊魯以周公故遂得用祈穀之郊蓋僭禮也然歲事之常不勝書每因變而書龜違者四牛災者四大非時者一蓋因變以著僭為後世戒也日至有常期祈穀用辛則卜日於前一旬卜之不從更一

旬而再卜卜不過三四卜非禮也免縱也牛在滌三
月曰牲不郊猶卜免牲從則免不從則繫以待庀牲
也周禮大司樂舞雲門以祀天神舞咸池以祭地示
舞大韶以祀四望舞大夏以祭山川四望附乎天山
川附乎地魯止三望降於王也望郊之細不郊而猶
望好僭也

秋七月

冬杞伯姬來求婦

夫人之教不施境中况與鄰國締姻乎蕩伯姬逆婦非姑道也杞伯姬求婦非母道也

狄圍衛

狄愈張也前侵齊晉不討故又圍衛晉之於衛伐而出之訟而執之今被圍而不之救視齊之存三亡國何如也然則桓文烏可並稱哉

十有二月衛遷于帝丘

避狄難也國之興亡在德不在險社稷之主不可以

輕動周有西戎之難東遷而遂衰楚有群蠻之叛不
從而復振唐西幸而亂宋南渡而弱書遷帝丘垂戒
遠矣

三十有二年

春王正月

夏四月己丑鄭伯捷卒

衛人侵狄

秋衛人及狄盟

按左氏狄有亂衛人侵狄狄請平衛人及狄盟夫衛
被狄患國凡再遷幾不國矣今乘狄難而侵之迨其
既屈遂即其地而盟之自是狄勢稍戢蓋狄情畏強
侮弱而衛制之得其機也然制敵有機自治有道道
之不修非本計也

冬十有二月己卯晉侯重耳卒

晉文經歷險阻發憤為雄城濮踐土幾軼齊桓而上
之然急功尚詐視桓之猶以德禮屬諸侯遠不逮矣

乃桓沒身遂衰而晉屢世伯者桓初任管仲後用三
豎文之從者皆卿材也三軍之帥讓而上德故子孫
賴之維持不替得人者昌信哉

三十有三年

春王二月秦人入滑

秦助晉圍鄭乃竊與鄭盟而戍鄭及文公卒復聽杞
子而謀襲鄭鄭有備謀不遂故滅滑書入者不能有
其地也本謀襲鄭以未及而滅滑故略之也

齊侯使國歸父來聘

報遂之聘也遂聘於今四年矣何報哉蓋晉文既卒齊乘機圖伯故假報聘以招魯乎

夏四月辛巳晉人及姜戎敗秦師于殽

晉人者晉子也在殽行師宜為罪矣乃變文書人若晉人同欲而不以晉子尸其事者全晉子也及者殊之也不使戎與晉為序也夫秦罪宜討然當請命於王且非明正其罪邀以敗之而先君受秦大惠頓棄

不顧乃全晉子何也曰滑同姓而近晉殺又晉地是門庭之寇也昔背晉約今蔑晉喪過不在晉矣

癸巳葬晉文公

狄侵齊

公伐邾取訾婁

左云報升陘之役夫升陘已閱十年矣今蓋乘晉喪而陵小為逐利之計耳書伐書取其志見矣

秋公子遂帥師伐邾

左云邾不設備遂復伐之遂導君以不義宜其為魯禍也家鉉翁曰齊桓之沒宋楚爭伯魯乘之伐邾歲至於再晉文之沒秦晉交兵魯乘之伐邾亦歲至於再

晉人敗狄于箕

箕晉地狄伐晉至箕其橫極矣許翰曰自狄侵齊而晉未暇討中國歲有狄患至敗于箕而後不復犯是知戎狄之亂不得不震以武未易以德懷也

冬十月公如齊

晉襄初立公輕之且間晉伐邾晉交不可固矣故因齊聘而朝以自託豈謀國之道哉況周聘而卿往齊聘而公朝非禮甚矣

十有二月公至自齊

乙巳公薨于小寢

小寢內寢也彌留之際大臣在側所以正始終明顧命也即安於內非正也而婦寺得以為奸矣故書以

示戒公初政精明故魯頌作晚怠矣且用非其人遂
兆再世之亂

隕霜不殺草李梅實


周十二月夏十月也霜既隕矣草猶生而木再實反
常也蓋人事之失而咎徵應之也

晉人陳人鄭人伐許

晉文之伯許獨堅附楚而不至伐之宜矣然襄既覆
秦於殽挫狄於箕不患威不立患德之不昭耳何乃

於一年之內而三出師乎鄭貳於楚文公圍之而未
服今從晉者秦襲鄭而晉敗之故也

御纂春秋直解卷五下



覆校官檢討臣季學錦

校對官修撰臣張書勲

謄錄監生臣彭希純